


御定全唐詩錄

土岐文庫
文庫17
W65
8



全唐詩集卷之二十一
李白



010185189240

文章 17
W 65
8



御定全唐詩錄卷第二十一

禮部侍郎臣徐倬翰林院侍讀學士臣徐元正奉

旨校刊

李白二

古體詩二

聞丹丘子於城北營石門幽居中有高鳳遺跡僕
離羣遠懷亦有棲遁之志因叙舊以寄之

春華滄江月秋色碧海雲離居盈寒暑對此長思君思
君楚水南望君淮山北夢魂雖飛來會面不可得疇昔
在嵩陽同衾卧義皇綠蘿笑簪紱丹壑賤巖廊晚途各
分析乘興任所適僕在雁門關君為峨眉客心懸萬里

全唐詩錄卷第二十一

李白

昭和六十年二月一日
土岐善唐氏寄贈

外影滯兩鄉隔長劔復歸來相逢洛陽陌陌上何喧喧
都令心意煩迷津覺路失託勢隨風翻以茲謝朝列長
嘯歸故園故園恣閑逸求古散縹帙久欲尋名山婚娶
殊未畢人生信多故世事豈惟一念此憂如焚悵然若
有失聞君卧石門宿昔契彌敦方從桂樹隱不羨桃花
源高風起遐曠幽人跡復存松風清瑤瑟溪月湛芳樽
安居偶佳賞丹心期此論

月夜江行寄崔負外宗之

飄飄江風起蕭颯海樹秋登艫美清夜挂席移輕舟月
隨碧山轉水合青天流杳如星河上但覺雲林幽歸路
方浩浩徂川去悠悠徒悲蕙草歇復聽菱歌愁岸曲迷

後浦沙明瞰前洲懷君不可見望遠增離憂

宿白鷺洲寄楊江寧

朝別朱雀門暮棲白鷺洲波光搖海月星影入城樓望
美金陵宰如思瓊樹憂徒令魂入夢翻覺夜成秋綠水
解人意為余西北流因聲玉琴裏蕩漾寄君愁

寄東魯二稚子

吳地桑葉綠吳蠶已三眠我家寄東魯誰種龜陰田春
事已不及江行復茫然南風吹歸心飛隋酒樓前樓東
一株桃枝葉拂青煙此樹我所種別來向三年桃今與
樓齊我行尚未旋嬌女字平陽折花倚桃邊折花不見
我淚下如流泉小兒名伯禽與姊亦齊肩雙行桃樹下

撫背復誰憐念此失次第肝腸日憂煎裂素寫遠意因
之汶陽川

獨酌清溪江石上寄權昭夷

我攜一樽酒獨上江祖石自從天地開更長幾千尺舉
杯向天笑天迴日西照永願坐此石長垂嚴陵釣寄謝
山中人可與爾同調

下尋陽城汎彭蠡寄黃判官

浪動灌嬰井尋陽江上風開帆入天鏡直向彭湖東落
景轉疎雨晴雲散遠空名山發佳興清賞亦何窮石鏡
挂遙月香爐滅彩虹相思俱對此舉目與君同

江上寄元六林宗

霜落江始寒楓葉綠未脫客行悲清秋永路苦不達滄
波眇川汎白日隱天末停棹依林巒驚猿相叫聒夜分
河漢轉起視溟漲闊涼風何蕭蕭流水鳴活活浦沙淨
如洗海月明可掇蘭交空懷思瓊樹詎解渴勗哉滄洲
心歲晚庶不奪幽賞頗自得興遠與誰豁

宣州九日聞崔四侍御與宇文太守遊敬亭余時

登響山不同此賞醉後寄崔侍御

九日茱萸熟插鬢傷早白登高望山海滿目悲古昔遠
訪投沙人因為逃名客故交竟誰在獨有崔亭伯重陽
不相知載酒任所適手持一枝菊調笑二千石日莫岸
幘歸傳呼隘阡陌彤檐雙白鹿賓從何輝赫夫子在其

間遂成雲霄隔良辰與美景兩地方虛擲晚從南峯歸
蘿月下水壁却登郡樓望松色寒轉碧咫尺不可親棄
我如遺鳥

遊敬亭寄崔侍御

我家敬亭下輒繼謝公作相去數百年風期宛如昨登
高素秋月下望青山郭俯視鴛鴦羣飲啄自鳴躍夫子
雖躡蹬瑤臺雪中鶴獨立窺浮雲其心在寥廓時來顧
我笑一飯葵與藿世路如秋風相逢盡蕭索晉間玉具
劍意許無遺諾壯士不可輕相期在雲閣

自金陵泝流過白壁山玩月達天門寄句容王主

簿

滄江泝流歸白壁見秋月秋月照白壁皓如山陰雪幽
人停宵征賈客忘早發進帆天門山回首牛渚沒川長
信風來日出宿霧歇故人在咫尺新賞成胡越寄君青
蘭花惠好庶不絕

秋日魯郡堯祠亭上宴別杜補闕范侍御

我覺秋興逸誰云秋興悲山將落日去水與晴空宜魯
酒白玉壺送行駐金羈欹鞍憇古木解帶挂橫枝歌鼓
川上亭曲度神飈吹雲歸碧海夕雁沒青天時相失各
萬里茫然空爾思

留別曹南羣官之江南

我昔釣白龍放龍溪水傍道成本欲去揮手凌蒼蒼時

李白

來不關人談笑遊軒皇獻納少成事歸休辭建章十年
罷西笑覽鏡如秋霜閉劒琉璃匣鍊丹紫翠房身佩豁
落圖胥垂虎盤囊仙人駕綵鳳志在窮遐荒戀子四五
人徘徊未翱翔東流送白日驟歌蘭蕙芳仙宮兩無從
人間久摧藏范蠡說勾踐屈平去懷王飄飄紫霞心流
浪憶江鄉愁為萬里別復此一銜觴淮水帝王州金陵
繞丹陽樓臺照海色衣馬搖川光及此北望君相思淚
成行朝雲落夢渚瑤草空高堂帝子隔洞庭青楓滿瀟
湘懷君路綿邈覽古情淒涼登岳眺百川杳然萬恨長
却戀峨眉去弄景偶騎羊

留別西河劉少府

秋髮已種種所為竟無成間傾魯壺酒笑對劉公榮謂
我是方朔人間落歲星白衣千萬乘何事去天庭君亦
不得意高歌羨鴻冥世人若醢雞安可識梅生雖為刀
筆吏緬懷在赤城余亦如流萍隨波樂休明自有兩少
妾雙騎駿馬行東山春酒綠歸隱謝浮名

留別賈舍人至

大梁白雲起飄颻來南洲徘徊蒼梧野十見羅浮秋鰲
挾山海傾四溟揚洪流意欲托孤雁從之摩天遊鳳苦
道路難翱翔還崑丘不肖銜我去哀鳴慙不留遠客謝
主人明珠難暗投拂拭倚天劒西登岳陽樓長嘯萬里
風掃清霄中憂誰念劉越石化為繞指柔

秋風吹胡霜凋此簷下芳折芳怨歲晚離別悽以傷謬
攀青瑣賢延我於此堂君為長沙客我獨之夜郎勸此
一杯酒豈惟道路長剖珠兩分贈寸心貴不忘何必兒
女仁相看淚成行

贈別王山人歸布山

王子析道論微言破秋毫還歸布山隱興入天雲高爾
去安可遲瑤草恐衰歇我心亦懷歸屢夢松上月傲然
遂獨往長嘯開巖扉林壑久已蕪石道生薔薇願言弄
笙鶴歲晚來相依

送王屋山人魏萬還王屋

并序

王屋山人魏萬云自嵩宋沿吳相訪數千里不

遇乘興遊台越經永嘉觀謝公石門後於廣陵
相見美其愛文好古浪跡方外因述其行而贈
是詩

仙人東方生浩蕩弄雲海沛然乘天遊獨往失所在魏
侯繼大名本家聊攝城卷舒入元化跡與古賢并十三
弄文史揮筆如振綺辯折田巴生心齊魯連子西涉清
洛源頗驚人世喧采秀卧王屋因窺洞天門謁來遊嵩
峯羽客何雙雙朝攜月光子莫宿玉女窗鬼谷上窈窕
龍潭下奔淥東浮汴河水訪我三千里逸興滿吳雲飄
飄淝江汜揮手杭越間樟亭望潮還濤捲海門石雲橫
天際山白馬走素車雷奔駭心顏遙聞會稽美且度耶

溪水萬壑與千巖崢嶸鏡湖裏秀色不可名清輝滿江
城人遊月邊去舟在空中行此中久延佇入剡尋王許
笑讀曹娥碑沈吟黃絹語天台連四明日入向國清五
峯轉月色百里行松聲靈溪恣沿越華頂殊超忽石梁
橫青天側足履半月眷然思永嘉不憚海路賒掛席歷
海嶠迴瞻赤城霞赤城漸微沒孤嶼前曉兀水續萬古
流亭空千霜月縉雲川谷難石門最可觀瀑布挂北斗
莫窮此水端噴壁灑素雪空濛生晝寒却尋惡溪去寧
懼惡溪惡咆哮七十灘水石相噴薄路創李北海巖開
謝康樂松風和猿聲搜索連洞壑徑出梅花橋雙溪納
歸潮落帆金華岸赤松若可招沈約八詠樓城西孤岩

堯峯堯四荒外曠望羣川會雲卷天地開波連浙西大
亂流新安口北指嚴光瀨釣臺碧雲中邈與蒼嶺對稍
稍來吳都徘徊上姑蘇煙綿橫九疑漭蕩見五湖目極
心更遠悲歌但長吁迴繞楚江濱揮策楊子津身著日
本裘昂藏出風塵五月造我語知非佻儻人相逢樂無
限水石日在眼徒干五諸侯不致百金產吾友楊子雲
絃歌播清芬雖為江寧宰好與山公羣乘興但一行且
知我愛君君來幾何時仙臺應有期東窗綠玉樹定長
三五枝至今天壇人當笑爾歸遲我苦惜遠別茫然使
心悲黃河若不斷白首長相思

送楊山人歸天台

李白

客有思天台東行路超忽濤落浙江秋沙明浦陽月今
遊方厭楚昨夢先歸越且盡秉燭歡無辭凌晨發我家
小阮賢剖竹赤城邊詩人多見重官燭未曾然興引登
山屐情催泛海船石橋如可度攜手弄雲煙

送溫處士歸黃山白鶴峯舊居

黃山四千仞三十二蓮峯丹崖夾石柱菡萏金芙蓉伊
昔昇絕頂下窺天目松仙人鍊玉處羽化留餘蹤亦聞
溫伯雪獨往今相逢採秀辭五嶽攀巖歷萬重歸休白
鶴嶺渴飲丹砂井鳳吹我時來雲車爾當整去去陵陽
東行行芳桂叢迴溪十六度碧嶂盡晴空他日還相訪
乘橋躡綵虹

送韓準裴政孔巢父還山

獵客張兔置不能挂龍虎所以青雲人高歌在巖戶韓
生信英彥裴子含清真孔侯復秀出俱與雲霞親峻節
凌遠松同衾卧盤石斧冰漱寒泉三子同二屐時時或
乘興往往雲無心出山揖牧伯長嘯輕衣簪昨宵夢裏
還云弄竹溪月今晨魯東門悵飲與君別雪崖滑去馬
蘿徑迷歸人相思若煙草歷亂無冬春

金鄉送韋八之西京

客自長安來還歸長安去狂風吹我心西掛咸陽樹此
情不可道此別何時遇望望不見君連山起煙霧

送魯郡劉長史遷弘農長史

魯國一杯水難容橫海鱗仲尼且不敬况乃尋常人白
玉換斗粟黃金買尺薪閉門木葉下始覺秋非春聞君
向西遷地即鼎湖鄰寶鏡匣蒼蘚丹經埋素塵軒后上
天時攀龍遺小臣及此留惠愛庶幾風化淳魯縞如白
煙五縑不成束臨行贈貧交一尺重山嶽相國齊晏子
贈行不及言託陰當樹李忘憂當樹萱他日見張祿綈
袍懷舊恩

送裴十八圖南歸嵩山

何處可為別長安青綺門胡姬招素手延客醉金樽臨
當上馬時我獨與君言風吹芳蘭折日沒烏雀喧舉手
指飛鴻此情難具論同歸無早晚潁水有清源

君思潁水綠忽復歸嵩岑歸時莫洗耳為我洗其心洗
心得真情洗耳徒買名謝公終一起相與濟蒼生

送楊山人歸嵩山

我有萬古宅嵩陽玉女峯長留一片月挂在東溪松爾
去掇仙草菖蒲花紫茸歲晚或相訪青天騎白龍

涇川送族弟錚

涇川三百里若耶羞見之錦石照碧山兩邊白鷺鷥佳
境千萬曲客行無歇時上有琴高水下有陵陽祠仙人
不見我明月空相知問我何事來盧敖結幽期蓬山振
雄筆繡服揮清詞江湖發秀色草木含榮滋置酒送惠
連吾家稱白耆愧無海嶠作敢闕河梁詩見爾復幾朝

俄然告將離中流漾彩鷁列岸叢金羈歎息蒼梧鳳分
棲瓊樹枝清晨各飛去飄落天南垂望極落日盡秋深
暝猿悲寄情與流水但有長相思

送崔氏昆季之金陵

放歌倚東樓行子期曉發秋風渡江來吹落山上月主
人出美酒滅燭延清光二崔向金陵安得不盡觴水客
弄歸棹雲帆卷輕霜扁舟敬亭下五兩先飄揚峽石入
水花碧流日更長思君無歲月西笑阻河梁

登黃山凌歊臺送族弟溧陽尉濟充泛舟赴華陰
鸞乃鳳之族翱翔紫雲霓文章輝五色雙在瓊樹棲一
朝各飛去鳳與鸞俱啼炎赫五月中朱曦爍河堤爾從

泛舟役使我心魂淒秦地無草木南雲喧鼓鼙君王減
玉膳早起思鳴雞漕引救關輔疲人免塗泥宰相作霖
雨農夫得耕犁靜者伏草間羣才滿金閨空手無壯士
窮居使人低送君登黃山長嘯倚天梯小舟若鳧雁大
舟若鯨鯢開帆散長風舒卷與雲齊日入牛渚晦蒼然
夕煙迷相思在何許杳在洛陽西

酬崔五郎中

朔雲橫高天萬里起秋色壯士心飛揚落日空嘆息長
嘯出原野凜然寒風生幸遭聖明時功業猶未成奈何
懷良圖鬱悒獨愁坐杖策尋英豪立談乃知我崔公生
民秀緬邈青雲姿制作參造化託諷含神祇海嶽尚可

傾吐諾終不移是時霜飈寒逸興臨華池起舞拂長劍
四座皆揚着因得窮歡情贈我以新詩又結汗漫期九
垓遠相待舉身憇蓬壺濯足弄滄海從此凌倒景一去
無時還朝遊明光宮莫入閭闔關但得長把袂何必嵩
丘山

以詩代書荅元丹丘

青鳥海上來今朝發何處口銜雲錦字與我忽飛去鳥
去凌紫煙書留綺窗前開緘方一笑乃是故人傳故人
深相勗憶我勞心曲離居在咸陽三見秦草綠置書雙
袂間引領不暫間長望杳難見浮雲橫遠山

翫月金陵城西孫楚酒樓達曙歌吹日晚乘醉著

紫綺裘烏紗巾與酒客數人棹歌秦淮往石頭

訪崔四侍御

昨翫西城月青天垂玉鉤朝沽金陵酒歌吹孫楚樓忽
憶繡衣人乘船往石頭草裏烏紗巾倒披紫綺裘兩岸
拍手笑疑是王子猷酒客十數公崩騰醉中流謔浪棹
海客喧呼傲陽侯半道逢吳姬卷簾出揶揄我憶君到
此不知狂與羞一月一見君三杯便迴橈捨舟共連袂
行上南渡橋興發歌淥水秦客為之謳雞鳴復相招清
宴逸雲霄贈我數百字字字凌風飈繫之衣裘上相憶
每長謠

荅族姪僧中孚贈玉泉仙人掌茶

并序

余聞荊州玉泉寺近清溪諸山山洞往往有乳窟窟中多玉泉交流中有白蝙蝠大如鴉按仙經蝙蝠一名仙鼠千歲之後體白如雪棲則倒懸蓋飲乳水而長生也其水邊處處有茗草羅生枝葉如碧玉唯玉泉真公常采而飲之年八十餘歲顏色如桃花而此茗清香滑熟異於他者所以能還童振枯扶人壽也余遊金陵見宗僧中孚示余茶數十片拳然重疊其狀如手號為仙人掌茶蓋新出於玉泉之山曠古未覲因持之見遺兼贈詩要余答之遂有此作後之高僧大隱知仙人掌茶發乎中孚禪子及青蓮居

士李白也

常聞玉泉山山洞多乳窟仙鼠如白鴉倒懸清溪月茗生此中石玉泉流不歇根柯灑芳津採服潤肌骨叢老卷綠葉枝枝相接連曝成仙人掌似拍洪崖肩舉世未見之其名定誰傳宗英乃禪伯投贈有佳篇清鏡燭無鹽顧慙西子妍朝坐有餘興長吟播諸天

尋魯城北范居士失道落蒼耳中見范置酒摘蒼耳作

雁度秋色遠日靜無雲時客心不自得浩漫將何之忽憶范野人閑園養幽姿茫然起逸興但恐行來遲城壕失往路馬首迷荒陂不惜翠雲裘遂為蒼耳欺入門且

一笑把臂君為誰酒客愛秋蔬山盤薦霜梨他筵不下
筋此席忘朝饑酸棗垂北郭寒瓜蔓東籬還傾四五酌
自詠猛虎詞近作十日歡遠為千載期風流自簸蕩謔
浪偏相宜酣來上馬去却笑高陽池

遊太山

四月上太山石屏御道開六龍過萬壑澗谷隨縈迴馬
跡遶碧峯於今滿青苔飛流灑絕巘水急松聲哀北眺
崑嶂奇傾崖向東摧洞門閉石扇地底興雲雷登高望
蓬瀛想象金銀臺天門一長嘯萬里清風來玉女四五
人飄飄下九垓含笑引素手遺我流霞杯稽首再拜之
自愧非仙才曠然小宇宙棄世何悠哉

清曉騎白鹿直上天門山山際逢羽人方瞳好容顏捫
蘿欲就語却掩青雲關遺我鳥跡書飄然落巖間其字
乃上古讀之了不閑感此三嘆息從師方未還

平明登日觀舉手開雲關精神四飛揚如出天地間黃
河從西來窈窕入遠山憑崖攬八極目盡長空閑偶然
值青童綠髮雙雲鬟笑我晚學仙蹉跎凋朱顏躊躇忽
不見浩蕩難追攀

清齋三十日裂素寫道經吟誦有所得衆神衛我形雲
行信長風颯若羽翼生攀崖上日觀伏檻窺東溟海色
動遠山天雞已先鳴銀臺出倒景白浪翻長鯨安得不
死藥高飛向蓬瀛

日觀東北傾兩崖夾雙石海水落眼前天光遙空碧千
峯爭攢聚萬壑絕凌歷緬彼鶴上仙去無雲中跡長松
入霄漢遠望不盈尺山花異人間五月雪中白終當遇
安期於此煉玉液

朝飲王母池暝投天門關獨抱綠綺琴夜行青山間山
明月露白夜靜松風歇仙人遊碧峯處處笙歌發寂靜
娛清暉玉真連翠微想像鸞鳳舞飄飄龍虎衣捫天摘
匏瓜恍惚不憶歸舉手弄清淺誤攀織女機明晨坐相
失但見五雲飛

同友人舟行

楚臣傷江楓謝客拾海月懷沙去瀟湘挂席泛溟渤蹇

予訪前跡獨往造窮髮古人不可攀去若浮雲沒願言
弄倒景從此鍊真骨華頂窺絕溟蓬壺望超忽不知青
春度但怪綠芳歇空持釣鰲心從此謝魏闕

下終南山過斛斯山人宿置酒

莫從碧山下山月隨人歸却顧所來徑蒼蒼橫翠微相
攜及田家童稚開荆扉綠竹入幽徑青蘿拂行衣歡言
得所憇美酒聊共揮長歌吟松風曲盡河星稀我醉君
復樂陶然共忘機

春陪商州裴使君遊石娥溪

裴公有仙標拔俗數千丈澹蕩滄洲雲飄飄紫霞想剖
竹商洛間政成心已閑蕭條出世表冥寂閉元關我來

屬芳節解榻時相悅
褰帷對雲峯揚袂指松雪
暫出東城邊遂遊西巖前
橫天聳翠壁噴壑鳴紅泉
尋幽殊未歇愛此春光發
溪旁饒名花石上有好月
命駕歸去來露華生翠苔
淹留惜將晚復聽清猿哀
清猿斷人腸遊子思故鄉
明發首東路此歡焉可忘

金陵鳳凰臺置酒

置酒延落景金陵鳳凰臺
長波寫萬古心與雲俱開
借問往昔時鳳凰爲誰來
鳳凰去已久正當今日迴
明君越義軒天老坐三台
豪士無所用彈絲醉金罍
東風吹山花安可不盡杯
六帝沒幽草深宮冥綠苔
置酒勿復道歌鐘但相催

與周剛清溪玉鏡潭宴別

康樂上官去永嘉遊石門
江亭有孤嶼千載跡猶存
我來憇秋浦三入桃陂源
千峯照積雪萬壑盡啼猿
興與謝公合文因周子論
掃崖去落葉席月開清樽
溪當大樓南溪水正南奔
迴作玉鏡潭澄明洗心魂
此中得佳境可以絕嚙喧
清夜方歸來酣歌出平原
別後經此地爲余謝蘭蓀

泛沔州城南郎官湖 并序

乾元歲秋八月白遷於夜郎
遇故人尚書郎張謂出使夏口
沔州牧杜公漢陽宰王公觴於江城
之南湖樂天下之再平也
方夜水月如練清

光可掇張公殊有勝槩四望超然乃顧白曰此
湖古來賢豪遊者非一而在踐佳景寂寥無聞
夫子可為我標之嘉名以傳不朽白因舉酒酌
水號之曰郎官湖亦猶鄭圃之有僕射陂也席
上文士輔翼岑靜以為知言乃命賦詩紀事刻
石湖側將與大別山共相磨滅焉
張公多逸興共泛沔城隅當時秋月好不減武昌都四
座醉清光為歡古來無郎官愛此水因號郎官湖風流
若未減名與此山俱

天台曉望

天台鄰四明華頂高百越門標赤城霞樓棲滄島月憑

高澄遠覽直下見溟渤雲垂大鵬翻波動巨鼇沒風潮
爭洶湧神怪何翕忽觀奇跡無倪好道心不歇攀條摘
朱實服藥鍊金骨安得生羽毛千春卧蓬闕

登太白峯

西上太白峯夕陽窮登攀太白與我語為我開天關願
乘冷風去直出浮雲間舉手可近月前行若無山一別
武功去何時復見還

登瓦官閣

晨登瓦官閣極眺金陵城鍾山對北戶淮水入南榮漫
漫雨花落嘈嘈天樂鳴兩廊振法鼓四角吟風箏杳出
霄漢上仰攀日月行山空霸氣滅地古寒陰生寥廓雲

海晚蒼茫宮觀平門餘闔闔字樓識鳳凰名雷作百山
動神扶萬拱傾靈光何足貴長此鎮吳京

登梅崗望金陵贈族姪高座寺僧中孚

鍾山抱金陵霸氣昔騰發天開帝王居海色照宮闕羣
峯如逐鹿奔走相馳突江水九道來雲端遙明沒時遷
大運去龍虎勢休歇我來屬天清登覽窮楚越吾宗挺
禪伯特秀鸞鳳骨衆星羅青天明者獨有月冥居順生
理草木不剪伐煙窗引薜薇石壁老野蕨吳風謝安屐
白足傲履襪幾宿一下山蕭然忘干謁談經演金偈降
鶴舞海雪時聞天香來了與世事絕佳遊不可得春風
惜遠別賦詩留巖屏千載庶不滅

望廬山瀑布水

西登香爐峯南見瀑布水挂流三百丈噴壑數十里歛
如飛雷來隱若白虹起初驚河漢落半灑雲天裏仰觀
勢轉雄壯哉造化功海風吹不斷江月照還空中亂
激射左右洗青壁飛珠散輕霞流沫沸穹石而我樂名
山對之心益閑無論漱瓊液且得洗塵顏仍諧宿所好
永願辭人間

秋登巴陵望洞庭

清晨登巴陵周覽無不極明湖映天光徹底見秋色秋
色何蒼然際海俱澄鮮山青滅遠樹水綠無寒煙來帆
出江中去鳥向日邊風清長沙浦山空雲夢田瞻光惜

頽髮閱水悲徂年北渚旣蕩漾東流自潺湲郢人唱白雪越女歌採蓮聽此更腸斷憑厓淚如泉

荆門浮舟望蜀江

春水月峽來浮舟望安極正是桃花流依然錦江色江色綠且明茫茫與天平逶迤巴山盡搖曳楚雲行雪照聚沙雁花飛出谷鶯芳洲却已轉碧樹森森迎流目浦煙夕揚帆海月生江陵識遙火應到渚宮城

三峽

巫山夾青天巴水流若茲巴水忽可盡青天無到時三朝上黃牛三莫行太遲三朝又三莫不覺鬢成絲

自巴東舟行經瞿塘峽登巫山最高峯晚還題壁

江行幾千里海月十五圓始經瞿塘峽遂步巫山巔巫山高不窮巴國盡所歷日邊攀垂蘿霞外倚穹石飛步凌絕頂極目無纖煙却顧失丹壑仰觀臨青天青天若可捫銀漢去安在望雲知蒼梧記水辨瀛海周遊孤光晚歷覽幽意多積雪照空谷悲風鳴森柯歸途行欲曛佳趣尚未歇江寒早啼猿松暝已吐月月色何悠悠清猿響啾啾辭山不忍聽揮策還孤舟

江行寄遠

剗木出吳楚危槎百餘尺疾風吹片帆日莫千里隔別時酒猶在已爲異鄉客思君不可得愁見江水碧

上元夫人

上元誰夫人偏得王母嬌嗟峨三角髻餘髮散垂鬢裘
披青毛錦身著赤霜袍手提羸女兒間與鳳吹簫眉語
兩自笑忽然隨風飄

過四皓墓

我行至商洛幽獨訪神仙園綺復安在雲蘿尚宛然荒
涼千古跡蕪沒四墳連伊昔鍾金鼎何年閉玉泉隴寒
惟有月松古漸無煙木魅風號去山精雨嘯旋紫芝高
詠罷青史舊名傳今日併如此哀哉信可憐

蘇武

蘇武在匈奴十年持漢節白雁上林飛空傳一書札牧
羊邊地苦落日歸心絕渴飲月窟水饑餐天上雪東還

沙塞遠北愴河梁別泣把李陵衣相看泣成血

經下邳圯橋懷張子房

子房未虎嘯破產不為家滄海得壯士椎秦博浪沙報
韓雖不成天地皆振動潛匿遊下邳豈曰非智勇我來
圯橋上懷古欽英風唯見碧流水曾無黃石公嘆息此
人去蕭條徐泗空

望鸚鵡洲懷禰衡

魏帝營八極蟻視一禰衡黃祖斗筭人殺之受惡名吳
江賦鸚鵡落筆超羣英鏘鏘振金玉句句欲飛鳴鷺鷥
啄孤鳳千春傷我情五嶽起方寸隱然詎可平才高竟
何施寡識冒天刑至今芳洲上蘭蕙不忍生

姑孰十詠

姑孰溪

愛此溪水閑乘流與無極漾楫怕鷗驚垂竿待魚食波
翻曉雲影岸疊春山色何處浣紗人紅顏未相識

丹陽湖

湖與元氣連風波浩難止天外賈客歸雲間片帆起龜
遊蓮葉上鳥宿蘆花裏少女棹歸舟歌聲逐流水

謝公宅

青山日將暝寂寞謝公宅竹裏無人聲池中虛月白荒
庭衰草徧廢井蒼苔積唯有清風閒時時起泉石

凌歊臺

曠望登古臺臺高極人目疊障列遠空雜花間平陸間
雲入窗牖野翠生松竹欲覽碑上文苔侵豈堪讀

桓公井

桓公名已古廢井曾未竭石甃冷蒼苔寒泉湛孤月秋
來桐暫落春至桃還發路遠人罕窺誰能見清潔

慈姥竹

野竹攢石生含煙映江島翠色落波深虛聲帶寒早龍
吟曾未聽鳳曲吹應好不學蒲柳凋貞心常自保

望夫山

顛望臨碧空怨情感離別江草不知愁巖花但爭發雲
山萬重隔音信千里絕春去秋復來相思幾時歇

牛渚磯

絕壁臨巨川連峯勢相向亂石流湍間迴波自成浪但
驚羣木秀莫測精靈狀更聽猿夜啼憂心醉江上

靈墟山

丁令辭世人拂衣向仙路伏鍊九丹成方遂五雲去松
蘿蔽幽洞桃杏深隱處不知曾化鶴遼海歸幾度

天門山

迴出江山上雙峯自相對岸映松色寒石分浪花碎參
差遠天際縹緲晴霞外落日舟去遙迴首沈青靄

尋高鳳石門山中元丹丘

尋幽無前期乘興不覺遠蒼崖渺難涉白日忽欲晚未

窮三四山已歷千萬轉寂寂聞猿愁行行見雲收高松
來好月空谷宜清秋溪深古雪在石斷寒泉流峯巒秀
中天登眺不可盡丹丘遙相呼顧我忽而哂遂造窮谷
間始知靜者閑留歡達永夜清曉方言還

月下獨酌

花下一壺酒獨酌無相親舉杯邀明月對影成三人月
既不解飲影徒隨我身暫伴月將影行樂須及春我歌
月徘徊我舞影凌亂醒時同交歡醉後各分散永結無
情遊相期邈雲漢

天若不愛酒酒星不在天地若不愛酒地應無酒泉天
地既愛酒愛酒不愧天已聞清比聖復道濁如賢賢聖

既已飲何必求神仙三杯通大道一斗合自然但得酒
中趣勿為醒者傳

三月咸陽城千花晝如錦誰能春獨愁對此徑須飲窮
通與脩短造化夙所稟一樽齊死生萬事固難審醉後
失天地兀然就孤枕不知有吾身此樂最為甚

尋山僧不遇作

石徑入丹壑松門閉青苔閑階有鳥跡禪室無人開窺
窗見白拂挂壁生塵埃使我空歎息欲去仍徘徊香雲
徧山起花雨從天來已有空樂好况聞清猿哀了然絕
世事此地方悠哉

待酒不至

玉壺繫青絲沽酒來何遲山花向我笑正好銜杯時晚
酌東窗下流鶯復在茲春風與醉客今日乃相宜

獨酌

春草如有意羅生玉堂陰東風吹愁來白髮坐相侵獨
酌勸孤影閑歌面芳林長松爾何知蕭瑟為誰吟手舞
石上月膝橫花間琴過此一壺外悠悠非我心

春日獨酌

我有紫霞想緬懷滄洲間思對一壺酒澹然萬事閑橫
琴倚高松把酒望遠山長空去鳥沒落日孤雲還但恐
光景晚宿昔成秋顏

金陵江上遇蓬池隱者

李白

心愛名山遊身隨名山遠羅浮麻姑臺此去或未返遇
君蓬池隱就我石上飯空言不成歡強笑惜日晚綠水
向雁門黃雲蔽龍山嘆息兩客鳥徘徊吳越間一語一
執手留連夜相久解我紫綺裘且換金陵酒酒來笑復
歌興酣樂事多水影弄月色清光奈愁何明晨挂帆席
離恨滿滄波

日夕山中忽然有懷

久卧青山雲遂為青山客山深雲更好賞弄終日夕月
銜樓間峯泉漱階下石素心自此得真趣非外惜龜啼
桂方秋風滅籟歸寂緬思洪崖術欲往滄海隔雲車來
何遲撫已空嘆息

春日醉起言志

處世若大夢胡為勞其生所以終日醉頽然卧前楹覺
來盼庭前一鳥花間鳴借問此何時春風語流鶯感之
欲嘆息對酒還自傾浩歌待明月曲盡已忘情

對酒

勸君莫拒杯春風笑人來桃李如舊識傾花向我開流
鶯啼碧樹明月窺金壘昨日朱顏子今日白髮催棘生
石虎殿鹿走姑蘇臺自古帝王宅城闕閉黃埃君若不
飲酒昔人安在哉

嘲王歷陽不肖飲酒

地白風色寒雪花大如手笑殺陶淵明不飲杯中酒浪

撫一張琴虛栽五株柳空負頭上巾吾於爾何有

秋夕旅懷

涼風度秋海吹我鄉思飛連山去無際流水何時歸目
極浮雲色心斷明月暉芳草歇柔艷白露催寒衣夢長
銀漢落覺罷天星稀含悲想舊國泣下誰能揮

感遇

吾愛王子晉得道伊洛濱金骨既不毀玉顏長自春可
憐浮丘公猗靡與情親舉首白日間分明謝時人二仙
去已遠夢想空慙慙
可嘆東籬菊莖疎葉且微雖言異蘭蕙亦自有芳菲未
泛盈樽酒徒沾清露輝當榮君不採飄落欲何依

昔余聞姮娥竊藥駐雲髮不自嬌玉顏方希鍊金骨飛
去身莫返含笑坐明月紫宮誇蛾眉隨手會凋歇

宋玉事楚王立身本高潔巫山賦彩雲郢路歌白雪舉
國莫能和巴人皆卷舌一感登徒言恩情遂中絕

尋陽紫極宮感秋作

何處聞秋聲脩脩北窗竹迴薄萬古心攬之不盈掬靜
坐觀衆妙浩然媚幽獨白雲南山來就我簷下宿嬾從
唐生決羞訪季主卜四十九年非一往不可復野情轉
蕭散世道有翻覆陶令歸去來田家酒應熟

江上秋懷

餐霞卧舊壑散髮謝遠遊山蟬號枯桑始復知天秋朔

雁別海裔越燕辭江樓颯颯風卷沙茫茫霧縈洲黃雲
結暮色白水揚寒流惻愴心自悲潺湲淚難收蘅蘭方
蕭瑟長嘆令人愁

秋夕書懷

北風吹海雁南渡落寒聲感此瀟湘客淒其流浪情海
懷結滄洲霞想遊赤城始探蓬壺事旋覺天地輕澹然
吟高秋閑卧瞻太清蘿月掩空幕松霜皓前楹滅見息
羣動獵微窮至精桃花有源水可以保吾生

題嵩山逸人元丹丘山居

并序

白久在盧霍元公近遊嵩山故交深情出處無
間岳信頻及許為主人欣然適會本意當冀長

往不返欲便舉家就之兼書共遊因有此贈

家本紫雲山道風未淪落沈懷丹丘志冲賞歸寂寞竭
來遊閩荒捫涉窮禹鑿蚺緣泛潮海偃蹇涉盧霍憑雷
躡天窗弄影憇霞閣且欣登眺美頗愜隱淪諾三山曠
幽期四岳聊所託故人契嵩頽高義炳丹牘滅跡遺紛
躡終言本峯壑自矜林湍好不羨朝市樂偶與真意并
頓覺世情薄爾能折芳桂吾亦採蘭若拙妻好乘鸞嬌
女愛飛鶴提攜訪神仙從此鍊金藥

嘲魯儒

魯叟談五經白髮死章句問以經濟策茫如墜煙霧足
著遠游履首戴方山巾緩步從直道未行先起塵秦家

丞相府不重褒衣人君非叔孫通與我本殊倫時事且未達歸耕汶水濱

寄遠

青樓何所在乃在碧雲中寶鏡掛秋水羅衣輕春風新粧坐落日悵望金屏空念此送短書願因雙飛鴻
本作一行書慙慙道相憶一行復一行滿紙情何極瑤臺有黃鶴為報青樓人朱顏凋落盡白髮一何新自知未應還離居經三春桃李今若為當窗發光彩莫使香風飄留與紅芳待

玉筋落春鏡坐愁湖陽水聞與陰麗華風煙接鄰里青春已復過白日忽相催但恐荷花晚令人意已摧相思不惜夢日夜向陽臺

遠憶巫山陽花明淥江暖躊躇未得往淚向南雲滿春風復無情吹我夢魂斷不見眼中人天長音信短妾在春陵東君居漢江島一日望花光往來成白道一為雲雨別此地生秋草秋草秋蛾飛相思愁落暉何由一相見滅燭解羅衣

魯縞如玉霜筆題月氏書寄書白鸚鵡西海慰離居行數雖不多字字有委曲天末如見之開緘淚相續淚盡恨轉深千里同此心相思千萬里一書直千金

代贈遠

妾本洛陽人狂夫幽燕客渴飲易水波由來多感激胡

馬西北馳香駿搖綠絲鳴鞭從此去逐寇蕩邊陲昔去
有好言不言久離別燕支多美女走馬輕風雪見此不
記人恩情雲雨絕啼流玉筋盡坐恨金閨切織錦作短
書腸隨回紋結相思欲有寄恐君不見察焚之揚其灰
手跡自此滅

秋浦寄內

我今尋陽去辭家千里餘結荷愁水宿却寄大雷書雖
不同辛苦愴離各自居我自入秋浦三年北信疎紅顏
愁落盡白髮不能除有客自梁苑手攜五色魚開魚得
錦字歸問我何如江山雖道阻意合不為殊

自代內贈

寶刀截流水無有斷絕時妾意逐君行纏綿亦如之別
來門前草秋卷春轉碧掃盡更還生萋萋滿行跡鳴鳳
始相得雄鷲雌各飛遊雲落何山一往不見歸估客發
大樓知君在秋浦梁苑空錦衾陽臺夢行雨妾家三作
相失勢去西秦猶存舊歌管淒清聞四隣曲度入紫雲
啼無眼中人妾似井底桃開花向誰笑君如天上月不
宵一迴照窺鏡不自識別多憔悴深安得秦吉了爲人
道寸心

秋浦感主人歸燕寄內

霜凋楚關木始知殺氣嚴寥寥金天廓婉婉綠紅潛胡
燕別主人雙雙語前簷三飛四迴顧欲去復相瞻豈不

戀華屋終然謝珠簾我不及此鳥遠行歲已淹寄書道
中歎淚下不能緘

感興

十五遊神仙仙遊未曾歇吹笙吟松風汎瑟窺海月西
山玉童子使我鍊金骨欲逐黃鶴飛相呼向蓬闕
西國有美女結樓青雲端娥眉艷曉月一笑傾城歡高
節不可奪炯心如凝丹常恐彩色晚不為人所觀安得
配君子共乘雙飛鸞
竭來荆山客誰為珉玉分良寶絕見棄虛持三獻君直
木忌先伐芬蘭哀自焚盈滿天所損沈溟道所羣東海
有碧水西山多白雲魯連及夷齊可以躡青芬

寓言

搖裔雙綵鳳婉孌三青禽往還瑤臺裏鳴舞玉山岑以
歡秦娥意復得王母心區區精衛鳥銜木空哀吟
長安春色歸先入青門道綠楊不自持清風欲傾倒海
燕還秦宮雙飛入簾櫳相思不相見托夢遼城東

送王昌齡

漕水東去遠送君多莫情淹留野寺出向背孤山明前
望數千里中無蒲稗生夕陽滿舟楫但愛微波清舉杯
林月上解衣沙鳥鳴夜來蓮花界夢裏金陵城歎息此
離別悠悠江海行

御定全唐詩錄卷第二十一

Blank space for text on the right page.

御定全唐詩錄卷第二十二

禮部侍郎臣徐倬翰林院侍讀學士臣徐元正奉

旨校刊

李白三

古體詩三

蜀道難

噫吁嚱危乎高哉蜀道之難難於上青天蠶叢及魚鳧
開國何茫然爾來四萬八千歲不與秦塞通人烟西當
太白有鳥道可以橫絕峨眉巖地崩山摧壯士死然後
天梯石棧相鈎連上有六龍回日之高標下有衝波逆
折之迴川黃鶴之飛尚不得過猿猱欲度愁攀援青泥

全唐詩錄卷第二十二

李白

全唐詩錄卷第二十二

李白

何盤盤百步九折紫巖巒捫參歷井仰脅息以手撫膺
坐長嘆問君西遊何時還畏途巉巖不可攀但見悲鳥
號古木雄飛雌從繞林間又聞子規啼夜月愁空山蜀
道之難難於上青天使人聽此凋朱顏連峯去天不盈
尺枯松倒挂倚絕壁飛湍瀑流爭喧豗砢崖轉石萬壑
雷其險也若此嗟爾遠道之人胡為乎來哉劔閣崢嶸
而崔巍一夫當關萬夫莫開所守或匪親化為狼與豺
朝避猛虎夕避長蛇磨牙吮血殺人如麻錦城雖云樂
不如早還家蜀道之難難於上青天側身西望長咨嗟

嚴武傳云武為劔南節度使房琯以故相為部內刺史武慢倨不為禮最厚杜甫然欲殺甫數矣李白作蜀道難為房杜危之也韋臯傳云天寶時李白為蜀道難以斥嚴武陸暢更為蜀道易以美韋臯或曰太白蜀道難譏章仇兼瓊蕭士贇注曰太白深知明皇幸蜀之非故作是詩以達意按太平廣記云太白初自蜀至諸說俱不足據

梁父吟

長嘯梁父吟何時見陽春君不見朝歌屠叟辭棘津八
十西來釣渭濱寧羞白髮照綠水逢時吐氣思經綸廣
張三千六百鈞風期暗與文王親大賢虎變愚不測當
年頗似尋常人又不見高陽酒徒起草中長揖山東隆
準公一聞游說騁雄辯兩女輟洗來趨風東下齊城七
十二指揮楚漢如旋蓬狂客落魄尚如此何況壯士當
羣雄我欲攀龍見明主雷公砰訇震天鼓帝傍投壺多
玉女三時大笑生電光倏爍晦冥起風雨閭闔九門不

李太白
李白

可通以額扣關闈者怒白日不照吾精誠杞國無事憂
天傾猗猗磨牙競人肉騶虞不折生草莖手接飛猱搏
彫虎側足焦原未言苦智者可卷愚者豪世人見我輕
鴻毛力排南山三壯士齊相殺之費二桃吳楚弄兵無
劇孟亞夫哈爾為徒勞梁父吟梁父吟聲正悲張公兩
龍劔神物合有時風雲感會起屠釣大人峴岬當安之

將進酒

君不見黃河之水天上來奔流倒海不復回君不見高
堂明鏡悲白髮朝如青絲暮成雪人生得意須盡歡莫
使金樽空對月天生我材必有用千金散盡還復來烹
羊宰牛且為樂會須一飲三百杯岑夫子丹丘生將進

酒君莫停與君歌一曲請君為我傾耳聽鐘鼎玉帛豈
足貴但願長醉不用醒古來賢聖皆寂寞惟有飲者留
其名陳王昔時宴平樂斗酒十千恣譔譔主人何為言
少錢徑須沽取對君酌五花馬千金裘呼兒將出換美
酒與爾同銷萬古愁

行路難

金樽清酒斗十千玉盤珍羞直萬錢停杯投筯不能食
拔劔四顧心茫然欲渡黃河水塞川將登太行雪暗天
閑來垂釣坐谿上忽復乘舟夢日邊行路難行路難多
岐路今安在長風破浪會有時直挂雲帆濟滄海

長相思

長相思在長安絡緯秋啼金井闌微霜淒淒簾色寒孤
燈不明思欲絕卷帷望月空長嘆美人如花隔雲端上
有青冥之高天下有淥水之波瀾天長路遠魂飛苦夢
行不到關山難長相思摧心肝

日色已盡花含煙月明欲素愁不眠趙瑟初停鳳凰柱
蜀琴欲奏鴛鴦絃此曲有意無人傳願隨春風寄燕然
憶君迢迢隔青天昔時橫波目今為流淚泉不信妾腸
斷歸來看取明鏡前

春日行

深宮高樓入紫清金作蛟龍盤繡楹佳人當窗弄白日
絃將手語彈鳴箏春風吹落君王耳此曲乃是昇天行

因出天池汎蓬瀛樓船感沓波浪驚三千雙蛾獻歌笑
搗鐘考鼓宮殿傾萬姓聚舞歌太平我無為人自寧三
十六帝欲相迎仙人飄翩下雲輶帝不去留鎬京安能
為軒轅獨往入窅冥小臣拜獻南山壽陛下萬古垂鴻
名

前有一樽酒行

春風東來忽相過金樽綠酒生微波落花紛紛稍覺多
美人欲醉朱顏酡青軒桃李能幾何流光欺人忽蹉跎
君起舞日西夕當年意氣不肖平白髮如絲竟何益

夜坐吟

冬夜夜寒覺夜長沈吟久坐坐北堂冰合井泉月入閨

金缸青凝照悲啼金缸滅啼轉多掩妾淚聽君歌歌有
聲妾有情情聲合兩無違一語不入意從君萬曲梁塵
飛

獨漉篇

獨漉水中泥水濁不見月不見月尚可水深行人沒越
鳥從南來胡鴈亦北度我欲彎弓向天射惜其中道失
歸路落葉別樹飄零隨風客無所托悲與此同羅幃舒
卷似有人開明月直入無心可猜雄劍挂壁時時龍鳴
不斷犀象繡澀苔生國恥未雪何由成名神鷹夢澤不
顧鷓鴣為君一擊鵬搏九天

陽春歌

長安白日照春空綠楊結煙垂裏風披香殿前花始紅
流芳發色繡戶中繡戶中相經過飛燕皇后輕身舞紫
宮夫人絕世歌聖君三萬六千日歲歲年年奈樂何

楊叛兒

君歌楊叛兒妾勸新豐酒何許最關人烏啼白門柳烏
啼隱楊花君醉留妾家博山爐中沉香火雙煙一氣凌
紫霞

幽澗泉

拂彼白石彈我素琴幽澗愀兮流泉深善手明徽高張
清心寂歷似千古松颼颼兮萬尋中見愁猿吊影而危
處兮叫秋木而長吟客有哀時失職而聽者淚淋浪以

李太白
李太白
李太白

霑襟乃緝商綴羽潺湲成音吾但寫聲發情於妙指殊
不知此曲之古今幽澗泉鳴溪林

王昭君

漢家秦地月流影照明妃一上玉關道天涯去不歸漢
月還從東海出明妃西嫁無來日燕支長寒雪作花蛾
眉憔悴沒胡沙生乏黃金在圖畫死留青塚使人嗟

中山孺子妾歌

中山孺子妾特以色見珍雖然不如延年妹亦是當時
絕世人桃李出深井花艷驚上春一貴復一賤關天豈
由身芙蓉老秋霜團扇羞網塵戚姬髮髮入春市萬古
共悲辛

久別離

別來幾春未還家玉窗五見櫻桃花况有錦字書開緘
使人嗟至此腸斷彼心絕雲鬢霧鬢罷梳結愁如回飈
亂白雪去年寄書報陽臺今年寄書重相催東風兮東
風為我吹行雲使西來待來竟不來落花寂寂委青苔

白頭吟

錦水東北流波蕩雙鴛鴦雄巢漢宮樹雌弄秦草芳寧
同萬死碎綺翼不忍雲間兩分張此時阿嬌正嬌妬獨
坐長門愁日莫但願君恩顧妾深豈惜黃金買詞賦相
如作賦得黃金丈夫好新多異心一朝將聘茂陵女文
君因贈白頭吟東流不作西歸水落花辭條羞故林兔

絲固無情隨風任傾倒誰使女蘿枝而來強縈抱兩草
猶一心人心不如草莫捲龍鬚席從他生網絲且留琥
珀枕或有夢來時覆水再收豈滿杯棄妾已去難重回
古來得意不相負祇今惟見青陵臺

採蓮曲

若耶溪傍採蓮女笑隔荷花共人語日照新妝水底明
風飄香袂空中舉岸上誰家遊冶郎三三五五映垂楊
紫騮嘶入落花去見此踟躕空斷腸

白紵辭

揚清歌發皓齒北方佳人東鄰子且吟白紵停綠水長
裏拂面為君起寒雲夜捲霜海空胡風吹天飄塞鴻玉

顏滿堂樂未終館娃日落歌吹濛

月寒天清夜沈沈美人一笑千黃金垂羅舞榭揚哀音
郢中白雪且莫吟子夜吳歌動君心動君心冀君賞願
作天池雙鴛鴦一朝飛去青雲上

吳刀剪綵縫舞衣明妝麗服奪春暉揚眉轉衷若雪飛
傾城獨立世所稀激楚結風醉忘歸高堂月落燭已微
玉釵掛纓君莫違

擣衣篇

閨裏佳人年十餘嘯蛾對影恨離居忽逢江上春歸燕
銜得雲中尺素書玉手開絨長嘆息狂夫猶戍交河北
萬里交河水北流願為雙燕泛中洲君邊雲擁青絲騎

李白

李白

妾處苔生紅粉樓樓上春風日將歇誰能攬鏡看愁髮
曉吹弦管隨落花夜擣戎衣向明月明月高高刻漏長
真珠簾箔掩蘭堂橫垂寶幄同心結半拂瓊筵蘇合香
瓊筵寶幄連枝錦燈燭熒熒照孤寢有便憑將金剪刀
為君留下相思枕摘盡庭蘭不見君紅巾拭淚生氤氳
明年若更征邊塞願作陽臺一段雲

襄陽歌

落日欲沒峴山西倒著接離花下迷襄陽小兒齊拍手
攔街爭唱白銅鞮傍人借問笑何事笑殺山翁醉似泥
鷓鴣杓鸚鵡杯百年三萬六千日一日須傾三百杯遙
看漢水鴨頭綠恰似蒲萄初醱醅此江若變作春酒壘

麴便築糟丘臺千金駿馬換小妾笑坐雕鞍歌落梅車
傍側掛一壺酒鳳笙龍管行相催咸陽市上嘆黃犬何
如月下傾金罍君不見晉朝羊公一片石龜頭剝落生
莓苔淚亦不能為之墮心亦不能為之哀清風明月不
用一錢買玉山自倒非人推舒州杓力士鎗李白與爾
同死生襄王雲雨今安在江水東流猿夜聲

江上吟

木蘭之枻沙棠舟玉簫金管坐兩頭美酒樽中置千斛
載妓隨波任去留仙人有待乘黃鶴海客無心隨白鷗
屈平詞賦懸日月楚王臺榭空山丘興酣落筆搖五嶽
詩成笑傲凌滄洲功名富貴若長在漢水亦應西北流

侍從宜春苑奉詔賦龍池柳色初青聽新鶯百轉

歌

東風已綠瀛洲草紫殿紅樓覺春好池南柳色半青青
縈煙裊娜拂綺城垂絲百尺挂雕楹上有好鳥相和鳴
間關早得春風情春風卷入碧雲去千門萬戶皆春聲
是時君王在鎬京五雲垂暉耀紫清仗出金宮隨日轉
天迴玉輦繞花行始向蓬萊看舞鶴還過菖若聽新鶯
新鶯飛繞上林苑願入簫韶雜鳳笙

玉壺吟

烈士擊玉壺壯心惜暮年三杯拂劍舞秋月忽然高詠
涕泗漣鳳凰初下紫泥詔謁帝稱觴登御筵揄揚九重

萬乘主詭浪赤墀青瑣賢朝天數換飛龍馬敕賜珊瑚
白玉鞭世人不識東方朔大隱金門是謫仙西施宜笑
復宜嘖醜女效之徒累身君王雖愛蛾眉好無奈宮中
妬殺人

西嶽雲臺歌送丹丘子

西嶽崢嶸何壯哉黃河如絲天際來黃河萬里觸山動
盤渦轂轉秦地雷榮光休氣紛五綵千年一清聖人在
巨靈咆哮擘兩山洪波噴箭射東海三峯却立如欲摧
翠厓丹谷高掌開白帝金精運元氣石作蓮花雲作臺
雲臺閣道連窈冥中有不死丹丘生明星玉女備灑掃
麻姑搔背指爪輕我皇手把天地戶丹丘談天與天語

九重出入生光輝東來蓬萊復西歸玉漿儻惠故人飲
騎二茅龍上天飛

扶風豪士歌

洛陽三月飛胡沙洛陽城中人怨嗟天津流水波赤血
白骨相撐如亂麻我亦東奔向吳國浮雲四塞道路賒
東方日出啼早鷓城門人開掃落花梧桐楊柳拂金井
來醉扶風豪士家扶風豪士天下奇意氣相傾山可移
作人不倚將軍勢飲酒豈顧尚書期雕盤綺食會衆客
吳歌趙舞香風吹原嘗春陵六國時開心寫意君所知
堂中各有三千客明日報恩知是誰撫長劍一揚着清
水白石何離離脫吾帽向君笑飲君酒為君吟張良未

逐赤松去橋邊黃石知我心

梁園吟

我浮黃河去京闕挂席欲進波連山天長水濶厭遠涉
訪古始及平臺間平臺為客憂思多對酒遂作梁園歌
却憶蓬池阮公詠因吟淶水揚洪波洪波浩蕩迷舊國
路遠西歸安可得人生達命豈暇愁且飲美酒登高樓
平頭奴子搖大扇五月不熱疑清秋玉盤楊梅為君設
吳鹽如花皎白雪持鹽把酒但飲之莫學夷齊事高潔
昔人豪貴信陵君今人耕種信陵墳荒城虛照碧山月
古木盡入蒼梧雲梁王宮闕今安在枚馬先歸不相待
舞影歌聲散綠池空餘汴水東流海沈吟此事淚滿衣

黃金買醉未能歸連呼五白行六博分曹賭酒酣馳輝
歌且謠意方遠東山高卧時起來欲濟蒼生未應晚

鳴臯歌送岑徵君

若有人兮思鳴臯阻積雪兮心煩勞洪河凌競不可以
徑度冰龍鱗兮難容舸邈仙山之峻極兮聞天籟之嘈
嘈霜厓縞皓以合沓兮若長風扇海湧滄溟之波濤元
猿綠羆舔嵒岌岌咆柯振石駭膽慄魄羣呼而相號峯
崢嶸以路絕挂星辰於巖敷送君之歸兮動鳴臯之新
作交鼓吹兮彈絲觴清泠之池閣君不行兮何待若反
顧之黃鶴掃梁園之羣英振大雅於東洛巾征軒兮歷
阻折尋幽居兮越巘萼盤白石兮坐素月琴松風兮寂

萬壑望不見兮心氛氳蘿冥冥兮霰紛紛水橫洞以下
淥波小聲而上聞虎嘯谷而生風龍藏溪而吐雲寡鶴
清唳饑鼯嘖呻塊獨處此幽默兮愀空山而愁人雞聚
族以爭食鳳孤飛而無隣蝘蜓嘲龍魚目混珍嫫母衣
錦西施負薪若使巢由桎梏於軒冕兮亦奚異乎夔龍
躡躡於風塵哭何苦而救楚笑何誇而却秦吾誠不能
學二子沽名矯節以耀世兮固將棄天地而遺身白鷗
兮飛來長與君兮相親

橫江詞

人言橫江好儂道橫江惡一風三日吹倒山白浪高於
瓦官閣

金陵城西樓月下吟

金陵夜寂涼風發獨上高樓望吳越白雲映水搖空城
白露垂珠滴秋月月下沈吟久不歸古來相接眼中稀
解道澄江淨如練令人長憶謝元暉

白雲歌送劉十六歸山

楚山秦山多白雲白雲處處長隨君君今還入楚山裏
雲亦隨君渡湘水水上女蘿衣白雲早卧早行君早起

懷仙歌

一鶴東飛過滄海放心散漫知何在仙人浩歌望我來
應攀玉樹長相待堯舜之事不足驚自餘踽踽直可輕
巨鼇莫戴三山去我欲蓬萊頂上行

酬殷明佐見贈五雲裘歌

我吟謝朓詩上語朔風颯颯吹飛雨謝朓已沒青山空
後來繼之有殷公粉圖珍裘五雲色奕如晴天散彩虹
文章彪炳光陸離應是素娥玉女之所為輕如松花落
金粉濃似苔錦含碧滋遠山積翠橫海島殘霞飛丹映
江草凝毫採掇花露容幾年功成奪天造故人贈我我
不違著令山水含清暉頓驚謝康樂詩興生我衣襟前
林壑歛暝色裏上雲霞收夕霏羣仙長嘆驚此物千厓
萬嶺相縈鬱身騎白鹿行飄飄手翳紫芝笑披拂相如
不足誇鸛鶴王恭鶴氅安可方瑤臺雪花數千點片片
吹落春風香為君持此凌蒼蒼上朝三十六玉皇下窺

夫子不可及矯首相思空斷腸

贈裴十四

朝見裴叔則朗如行玉山
黃河落天走東海萬里寫入
胃懷間身騎白黿不敢度
金高南山買君顧徘徊六合
無相知飄若浮雲且西去

醉後贈從甥高鎮

馬上相逢揖馬鞭客中相見
客中憐欲邀擊筑悲歌飲
正值傾家無酒錢江東風光
不借人枉殺落花空自春
黃金逐手快意盡昨日破產
今朝貧丈夫何事空嘯傲
不如燒却頭上巾君為進士
不得進我被秋霜生旅鬢
時清不及英豪人三尺童兒
重廉藺匣中盤劍裝鰓魚

間在畧間未用渠且將換酒與君醉醉歸託宿吳專諸

贈漢陽輔錄事

鸚鵡洲橫漢陽渡水引寒煙
沒江樹南浦登樓不見君
君今罷官在何處漢口雙魚
白錦鱗令傳尺素報情人
其中字數何多少祇是相思
秋復春

江夏贈韋南陵冰

胡驕馬驚沙塵起胡兵飲馬
天津水君為張掖近酒泉
我竄三巴九千里天地再新
法令寬夜郎遷客帶霜寒
西憶故人不可見東風吹夢
到長安寧期此地忽相遇
驚喜茫如隨煙霧玉簫金管
喧四筵苦心不得申長句
昨日繡衣傾綠樽病如桃李
竟何言昔騎天子大宛馬

今乘欸段諸侯門賴遇南平豁方寸復兼夫子持清論
有似山開萬里雲四望青天解人悶人悶還心悶苦辛
長苦辛愁來飲酒二千石寒灰重暖生陽春山公醉後
能騎馬別是風流賢主人頭陀雲月多僧氣山水何曾
稱人意不然鳴笳按鼓戲滄流呼取江南女兒歌棹謳
我且為君搥碎黃鶴樓君亦為吾倒却鸚鵡洲赤壁爭
雄如夢裏且須歌舞寬離憂

對雪醉後贈王歷陽

有身莫犯飛龍鱗有手莫辦猛虎鬚君看昔日汝南市
白頭仙人隱玉壺子猷聞風動窗竹相邀共醉杯中綠
歷陽何異山陰時白雪飛花亂人目君家有酒我何愁

客多樂酣秉燭遊謝尚自能鸚鵡舞相如免脫鷓鴣裘
清晨鼓棹過江去千里相思明月樓

春日獨坐寄鄭明府

燕麥青青遊子悲河堤弱柳鬱金枝長條一拂春風起
盡日飄揚無定時我在河南別離久那堪坐此對窗牖
情人道來竟不來何人共醉新豐酒

寄王屋山人孟大融

我昔東海上勞山餐紫霞親見安期公食棗大如瓜中
年謁漢主不愜還歸家朱顏謝春暉白髮見生涯所期
就金液飛步登雲車願隨夫子天壇上閑與仙人掃落
花

憶舊遊寄譙郡元參軍

憶昔洛陽董糟丘爲余天津橋南造酒樓黃金白壁買
歌笑一醉累月輕王侯海內賢豪青雲客就中與君心
莫逆迴山轉海不作難傾情倒意無所惜我向淮南攀
桂枝君留洛北愁夢思不忍別還相隨相隨迢迢訪仙
城三十六曲水迴縈一溪初入千花明萬壑度盡松風
聲銀鞍金絡倒平地漢東太守來相迎紫陽之真人邀
我吹玉笙餐霞樓上動仙樂嘈然宛似鸞鳳鳴東長管
催欲輕舉漢中太守醉起舞手持錦袍覆我身我醉橫
眠枕其股當筵意氣凌九霄星離雨散不終朝分飛楚
關山水遙余旣還山尋故巢君亦歸家渡渭橋君家嚴

君勇貔虎作尹并州遏戎虜五月相呼度太行摧輪不
道羊腸苦行來北涼歲月深感君貴義輕黃金瓊杯綺
食青玉案使我醉飽無歸心時時出向城西曲晉祠流
水如碧玉浮舟弄水簫鼓鳴微波龍鱗莎草綠興來攜
妓恣經過其若楊花似雪何紅妝欲醉宜斜日百尺清
潭寫翠娥翠娥嬋娟初月輝美人更唱舞羅衣清風吹
歌入空去歌曲自繞行雲飛此時行樂難再遇西遊因
獻長楊賦北闕青雲不可期東山白首還歸去渭橋南
頭一遇君鬱臺之北又離羣問余別恨知多少落花春
暮爭紛紛言亦不可盡情亦不可極呼兒長跪緘此辭
寄君千里遙相憶

廬山謠寄盧侍御虛舟

我本楚狂人鳳歌笑孔丘手持綠玉杖朝別黃鶴樓五
嶽尋仙不辭遠一生好入名山遊廬山秀出南斗傍屏
風九疊雲錦張影落明湖青黛光金闕前開二峯長銀
河倒挂三石梁香爐瀑布遙相望迴崖沓嶂凌蒼蒼翠
影紅霞映朝日鳥飛不到吳天長登高壯觀天地間大
江茫茫去不還黃雲萬里動風色白波九道流雪山好
為廬山謠興因廬山發閒窺石鏡清我心謝公行處蒼
苔沒早服還丹無世情琴心三疊道初成遙見仙人綵
雲裏手把芙蓉朝玉京先期汗漫九垓上願接盧敖遊
太清

自漢陽病酒歸寄王明府

去歲左遷夜郎道琉璃硯水長枯槁今歲敕放巫山陽
蛟龍筆翰生輝光聖主還聽子虛賦相如却與論文章
願掃鸚鵡洲與君醉百場嘯起白雲飛七澤歌吟淥水
動三湘莫惜連船沽美酒千金一擲買春芳

早春寄王漢陽

聞道春還未相識走傍寒梅訪消息昨夜東風入武陽
陌頭楊柳黃金色碧水浩浩雲茫茫美人不來空斷腸
預拂青山一片石與君連日醉壺觴

夢遊天姥吟留別

海客談瀛洲煙濤微茫信難求越人語天姥雲霓明滅

或可觀天姥連天向天橫勢拔五嶽掩赤城天台四萬
八千丈對此欲倒東南傾我欲因之夢吳越一夜飛度
鏡湖月湖月照我影送我至剡溪謝公宿處今尚在淥
水蕩漾清猿啼脚着謝公屐身登青雲梯半壁見海日
空中聞天雞千巖萬轉路不定迷花倚石忽已暝熊咆
龍吟殷巖泉慄深林兮驚層巔雲青青兮欲雨水澹澹
兮生煙列缺霹靂丘巒崩摧洞天石扉訇然中開青冥
浩蕩不見底日月照耀金銀臺霓為衣兮風為馬雲中
君兮紛紛而來下虎鼓瑟兮鸞回車仙之人兮列如麻
忽魂悸以魄動恍驚起而長嗟惟覺時之枕席失向來
之煙霞世間行樂亦如此古來萬事東流水別君去兮

何時還且放白鹿青崖間須行即騎訪名山安能摧眉
折腰事權貴使我不得開心顏

金陵酒肆留別

風吹柳花滿店香吳姬壓酒勸客嘗金陵子弟來相送
欲行不行各盡觴請君試問東流水別意與之誰短長

南陵別兒童入京

白酒新熟山中歸黃雞啄黍秋正肥呼童烹雞酌白酒
兒女嬉笑牽人衣高歌取醉欲自慰起舞落日爭光輝
游說萬乘苦不早著鞭跨馬涉遠道會稽愚婦輕買臣
余亦辭家西入秦仰天大笑出門去我輩豈是蓬蒿人

魯郡堯祠送竇明府薄華還西京

時久病
初起作

李白

李白

朝策犁眉騮舉鞭力不堪強扶愁疾向何處角巾微服
堯祠南長楊掃地不見日石門噴作金沙潭笑誇故人
指絕境山光水色青於藍廟中往往來擊鼓堯本無心
爾何苦門前長跪雙石人有女如花日歌舞銀鞍繡轂
往復迴簸林蹶石鳴風雷遠煙空翠時明滅白鷗歷亂
長飛雪紅泥亭子赤闌干碧流環轉青錦湍潏沈百丈
洞海底那知不有蛟龍蟠君不見綠珠潭水流東海綠
珠紅粉沈光彩綠珠樓下花滿園今日曾無一枝在昨
夜秋聲閭闔來洞庭木落騷人哀遂將三五少年輩登
高遠望形神開生前一笑輕九鼎魏武何悲銅雀臺我
歌白雲倚窗牖爾聞其聲但揮手長風吹月度海來遙

勸仙人一杯酒酒中樂酣宵向分舉觴酌堯堯可聞何
不令臯陶擁篲橫八極直上青天揮浮雲高陽小飲真
瑣瑣山公醕酌何如我竹林七子去道賒蘭亭雄筆安
足誇堯祠笑殺五湖水至今憔悴空荷花爾向西秦我
東越暫向瀛洲訪金闕藍田太白若可期為余掃灑石
上月

單父東樓秋夜送族弟沈之秦

爾從咸陽來問我何勞苦沐猴而冠不足言身騎土牛
滯東魯沈弟欲行凝弟留孤飛一雁秦雲秋坐來黃葉
落四五北斗已挂西城樓絲桐感人絃亦絕滿堂送君
皆惜別卷簾見月清興來疑是山陰夜中雪明日斗酒

李白

李白

別惆悵清路塵遙望長安日不見長安人長安宮闕九
天上此地曾經為近臣一朝復一朝髮白心不改屈原
憔悴滯江潭亭伯流離放遼海折翩翩飛隨轉蓬聞弦
虛墜下霜空聖朝久棄青雲士他日誰憐張長公

送羽林陶將軍

將軍出使擁樓船江上旌旗拂紫煙萬里橫戈探虎穴
三杯拔劍舞龍泉莫道詞人無膽氣臨行將贈繞朝鞭

同王昌齡送族弟襄歸桂陽

爾家何在瀟湘川青莎白石長江邊昨夢江花照江國
幾枝正發東窗前覺來欲往心悠然魂隨越鳥飛南天
秦雲連山海相接桂水橫煙不可涉送君此去令人愁

風帆茫茫隔河洲春潭瓊草綠可折西寄長安明月樓

送蕭三十一之魯中兼問稚子伯禽

六月南風吹白沙吳牛喘月氣成霞水國鬱蒸不可處
時炎道遠無行車夫子如何涉江路雲帆嫋嫋金陵去
高堂倚門望伯魚魯中正是趨庭處我家寄在沙丘傍
三年不歸空斷腸君行既識伯禽子應駕小車騎白羊

宣州謝朓樓餞別校書叔雲

棄我去者昨日之日不可留亂我心者今日之日多煩
憂長風萬里送秋雁對此可以酣高樓蓬萊文章建安
骨中間小謝又清發俱懷逸興壯思飛欲上青天覽日
月抽刀斷水水更流舉杯銷愁愁復愁人生在世不稱

意明朝散髮弄扁舟

酬中都吏攜斗酒雙魚於逆旅見贈

魯酒若琥珀汶魚紫錦鱗山東豪吏有俊氣手攜此物
贈遠人意氣相傾兩相顧斗酒雙魚表情素雙鯉呀呷
鬢鬣張潑刺銀盤欲飛去呼兒拂机霜刃揮紅腮花落
白雪霏為君下筯一餐飽醉著金鞍上馬歸

醉後荅丁十八以詩譏余搥碎黃鶴樓

黃鶴高樓已搥碎黃鶴仙人無所依黃鶴上天訴玉帝
却放黃鶴江南歸神明太守再雕飾新圖粉壁還芳菲
一州笑我為狂客少年往來相譏君平簾下誰家子
云是遼東丁令威作詩調我驚逸興白雲遶筆窗前飛

待取明朝酒醒罷與君爛熳尋春暉

攜妓登梁王樓霞山孟氏桃園中

碧草已滿地柳與梅爭春謝公自有東山妓金屏笑坐
如花人今日非昨日明日還復來白髮對綠酒強歌心
已摧君不見梁王池上月昔照梁王樽酒中梁王已去
明月在黃鸝愁醉啼春風分明感激眼前事莫惜醉卧
桃園東

把酒問月

青天有月來幾時我今停杯一問之人攀明月不可得
月行却與人相隨皎如飛鏡臨丹闕綠煙滅盡清暉發
但見宵從海上來寧知曉向雲間没白兔搗藥秋復春

嫦娥孤棲與誰鄰
今人不見古時月
今月曾經照古人
古人今人若流水
水共看明月皆如此
唯願當歌對酒時
月光長照金樽裏

三五七言

秋風清秋月明落
葉聚還散寒鴉棲
復驚相思相見知
何日此時此夜難
爲情

寄遠

憶昨東園桃李紅
碧枝與君此時初
別離金瓶落井無
消息令人行嘆復
坐思坐思行嘆成
楚越春風玉顏畏
銷歇碧窗紛紛下
落花青樓寂寂空
明月兩不見但相
思空留錦字表心
素至今緘愁不忍
窺

美人在時花滿堂
美人去後餘空牀
牀中繡被卷不寢
至今三載聞餘香
香亦竟不滅人亦
竟不來相思黃葉
落白露濕青苔

愛君芙蓉嬋娟之
艷色若可食兮難
再得憐君冰玉清
迴之明心情不極
兮意已深朝共琅
玕之綺食夜同駕
騫之錦衾恩情婉
變忽爲別使人莫
錯亂愁心亂愁心
涕如雪寒燈厭夢
魂欲絕覺來相思
生白髮盈盈漢水
若可越可惜凌波
步羅襪美人美人
兮歸去來莫作朝
雲暮雨兮飛陽臺

對酒

蒲萄酒金叵羅
吳姬十五細馬
馱青黛畫眉紅
錦靴道

字不正嬌唱歌玳瑁筵中懷裏醉芙蓉帳裏奈君何

怨情

新人如花雖可寵故人如玉由來重花性飄揚不自持
玉心皎潔終不移故人昔新今尚故還見新人有故時
請看陳后黃金屋寂寂珠簾生網絲

思邊

去年何時君別妾南園綠草飛蝴蝶今歲何時妾憶君
西山白雪暗秦雲玉關去此三千里欲寄音書那可聞

示金陵子

金陵城東誰家子竊聽琴聲碧窗裏落花一片天上來
隨人直渡西江水楚歌吳語嬌不成似能未能最有情

謝公正要東山妓攜手林泉處處行

御定全唐詩錄卷第二十二

Blank page with vertical lines for text.

御定全唐詩錄卷第二十三

禮部侍郎臣徐倬翰林院侍讀學士臣徐元正奉

旨校刊

李白四

近體詩一

塞下曲

五月天山雪無花祇有寒笛中聞折柳春色未曾看曉
戰隨金鼓宵眠抱玉鞍願將晉下劔直為斬樓蘭
駿馬似風颭鳴鞭出渭橋彎弓辭漢月插羽破天驕陣
解星芒盡營空海霧消功成畫麟閣獨有霍嫖姚
塞虜乘秋下天兵出漢家將軍分虎竹戰士卧龍沙邊

全唐詩錄卷第二十三 李白

月隨弓影胡霜拂，劔花玉關殊未入。少婦莫長嗟。

宮中行樂詞

小小生金屋，盈盈在紫微。山花插寶髻，石竹繡羅衣。每
出深宮裏，常隨步輦歸。只愁歌舞散，化作綵雲飛。
柳色黃金嫩，梨花白雪香。玉樓巢翡翠，金殿鎖鴛鴦。選
妓隨雕輦，徵歌出洞房。宮中誰第一，飛燕在昭陽。
盧橘爲秦樹，蒲萄出漢宮。煙花宜落日，絲管醉春風。笛
奏龍吟水，簫鳴鳳下空。君王多樂事，還與萬方同。
玉樹春歸日，金宮樂事多。後庭朝未入，輕輦夜相過。笑
出花間語，嬌來竹下歌。莫教明月去，留著醉嫦娥。
繡戶香風暖，紗窗曙色新。宮花爭笑日，池草暗生春。綠

樹聞歌鳥，青樓見舞人。昭陽桃李月，羅綺自相親。
今日明光裏，還須結伴遊。春風開紫殿，天樂下珠樓。艷
舞全知巧，嬌歌半欲羞。更憐花月夜，宮女笑藏鉤。
寒雪梅中盡，春風柳上歸。宮鶯嬌欲醉，簷燕語還飛。遲
日明歌席，新花艷舞衣。晚來移綵仗，行樂泥光輝。
水綠南薰殿，花紅北闕樓。鶯歌聞太液，鳳吹繞瀛洲。素
女鳴珠珮，天人弄綵毬。今朝風日好，宜入未央遊。

秋思

燕支黃葉落，妾望自登臺。海上碧雲斷，單于秋色來。胡
兵沙塞合，漢使玉關回。征客無歸日，空悲蕙草摧。

秋浦歌

秋浦猿夜愁黃山堪白頭清溪非隴水翻作斷腸流欲
去不得去薄遊成久遊何年是歸日雨淚下孤舟

紫騮馬

紫騮行且嘶雙翻碧玉蹄臨流不肖渡似惜錦障泥白
雪關山遠黃雲海戍迷揮鞭萬里去安得念春閨

贈孟浩然

吾愛孟夫子風流天下聞紅顏棄軒冕白首卧松雲醉
月頻中聖迷花不事君高山安可仰徒此揖清芬

見京兆韋參軍量移東陽

聞說金華渡東連五百灘全勝若耶好莫道此行難猿
嘯千谿合松風五月寒他年一攜手搖艇入新安

口號贈楊徵君鴻

陶令辭彭澤梁鴻入會稽我尋高士傳君與古人齊雲
卧留丹壑天書降紫泥不知楊伯起早晚向關西

贈崔秋浦

吾愛崔秋浦宛然陶令風門前五楊柳井上二梧桐山
鳥下廳事簷花落酒中懷君未忍去惆悵意無窮
崔令學陶令北窗常晝眠抱琴時弄月取意任無絃見
客但傾酒為官不愛錢東臯春事起種黍早歸田
河陽花作縣秋浦玉為人地逐名賢好風隨惠化春水
從天漢落山逼畫屏新應念金門客投沙吊楚臣

望九華贈青陽韋仲堪

李白

李白

昔在九江上遙觀九華峯
天河掛綠水秀出芙蓉我
欲一揮手誰人可相從
君為東道主於此卧雲松

沙丘城下寄杜甫

我來竟何事高卧沙丘城
城邊有古樹日夕連秋聲
魯酒不可醉齊歌空復情
思君若汶水浩蕩寄南征

寄當塗趙少府炎

晚登高樓望木落雙江清
寒山饒積翠秀色連州城
目送楚雲盡心悲胡雁聲
相思不可見迴首故人情

寄王漢陽

南湖秋月白王宰夜相邀
錦帳郎官醉羅衣舞女嬌
笛聲喧沔鄂歌曲上雲霄
別後空愁我相思一水遙

望漢陽柳色寄王宰

漢陽江上柳望客引東枝
樹樹花如雪紛紛亂若絲
春風傳我意草木別前知
寄謝弦歌宰西來定未遲

寄從弟宣州長史昭

爾佐宣州郡守官清且閒
常誇雲月好邀我敬亭山
五落洞庭葉三江遊未還
相思不可見歎息損朱顏

三山望金陵寄殷淑

三山懷謝朓水澹望長安
蕪没河陽縣秋江正此看
盧龍霜氣冷鳩鵲月光寒
耿耿憶瓊樹天涯寄一歡

廣陵贈別

金瓶沽美酒數里送君還
繫馬垂楊下銜杯大道間
天

邊看淥水海上見青山興罷各分袂何須別醉顏

別儲邕之剡中

借問剡中道東南指越鄉舟從廣陵去水入會稽長竹
色溪下綠荷花鏡裏香辭君向天姥拂石卧秋霜

留別龔處士

龔子樓閣地都無人世喧柳深陶令宅竹暗辟疆園我
去黃牛峽遙愁白帝猿贈君卷菘草心斷竟何言

渡荆門送別

渡遠荆門外來從楚國遊山隨平野盡江入大荒流月
下飛天鏡雲生結海樓仍憐故鄉水萬里送行舟

江夏別宋之悌

楚水清若空遙將碧海通人分千里外興在一杯中谷
鳥吟晴日江猿嘯晚風平生不下淚於此泣無窮

南陽送客

斗酒勿為薄寸心貴不忘坐惜故人去偏令遊子傷離
顏怨芳草春思結垂楊揮手再三別臨岐空斷腸

送張舍人之江東

張翰江東去正值秋風時天清一雁遠海闊孤帆遲白
日行欲暮滄波杳難期吳洲如見月千里幸相思

魯郡東石門送杜二甫

醉別復幾日登臨徧池臺何時石門路重有金樽開秋
波落泗水海色明徂徠飛蓬各自遠且盡手中杯

送殷淑

白鷺洲前月天明送客迴青龍山後日早出海雲來流
水無情去征帆逐吹開相看不忍別更進手中杯

送友人

青山橫北郭白水遶東城此地一為別孤蓬萬里征浮
雲遊子意落日故人情揮手自茲去蕭蕭班馬鳴

送別

斗酒渭城邊壚頭醉不眠梨花千樹雪楊葉萬條煙惜
別傾壺醕臨分贈馬鞭看君頰上去新月到應圓

送友人入蜀

見說蠶叢路崎嶇不易行山從人面起雲傍馬頭生芳

樹籠秦棧春流遶蜀城升沈應已定不必問君平

送趙雲卿

白玉一杯酒綠楊三月時春風餘幾日兩鬢各成絲秉
燭唯須飲投竿也未遲如逢渭川獵猶可帝王師

江夏送張丞

欲別心不忍臨行情更親酒傾無限月客醉幾重春藉
草依流水攀花贈遠人送君從此去迴首泣迷津

侍從遊宿溫泉宮作

羽林十二將羅列應星文霜仗懸秋月霓旌卷夜雲嚴
更千戶肅清樂九天聞日出瞻佳氣葱葱繞聖君

春日遊羅敷潭

行歌入谷口路盡無人躋攀崖度絕壑弄水尋迴溪雲
從石上起客到花間迷淹留未盡興日落羣峯西

遊秋浦白筇陂

何處夜行好月明白筇陂山光搖積雪猿影挂寒枝但
恐佳景晚小令歸棹移人來有清興及此又相思
白筇夜長嘯爽然溪谷寒魚龍動陂水處處生波瀾天
借一明月飛來碧雲端故鄉不可見腸斷正西看

登新平樓

去國登茲樓懷歸傷暮秋天長落日遠水淨寒波流秦
雲起嶺樹胡雁飛沙洲蒼蒼幾萬里目極令人愁

與夏十二登岳陽樓

樓觀岳陽盡川迴洞庭開雁引愁心去山銜好月來雲
間連下榻天上接行杯醉後涼風起吹人舞裏迴
與賈至舍人於龍興寺剪落梧桐枝望瀼湖

剪落青梧枝瀼湖坐可窺雨洗秋山淨林光澹碧滋水
閒明鏡轉雲繞畫屏移千古風流事名賢共此時

挂席江山待月有懷

待月月未出望江江自流倏忽城西郭青天懸玉鉤素
華雖可攬清景不同遊耿耿金波裏空瞻鵲樓

秋登宣城謝朓北樓

江城如畫裏山曉望晴空兩水夾明鏡雙橋落彩虹人
煙寒橘柚秋色老梧桐誰念北樓上臨風懷謝公

過崔八丈水亭

高閣橫秀氣清幽併在君簷飛宛溪水窗落敬亭雲
猿嘯風中斷漁歌月裏聞閒隨白鷗去沙上自爲羣

太原早秋

歲落衆芳歇時當大火流霜威出塞早雲色渡河秋
夢繞邊城月心飛故國樓思歸若汾水無日不悠悠

宿五松山下荀媪家

我宿五松下寂寥無所歡田家秋作苦鄰女夜春寒
跪進彫胡飯月光明素盤令人慙漂母三謝不能餐

金陵

晉家南渡日此地舊長安地即帝王宅山爲龍虎盤
金

陵空壯觀天塹淨波瀾醉客回橈去吳歌且自歡
地擁金陵勢城迴江水流當時百萬戶夾道起朱樓
故國生春草王宮沒古丘空餘後湖月波上對江州
六代興亡國三杯爲爾歌苑方秦地少山似洛陽多
古殿吳花草深宮晉綺羅併隨人事滅東逝與滄波
陪宋中丞武昌夜飲懷古

清景南樓夜風流在武昌庾公愛秋月乘興坐胡床
龍笛吟寒水天河落曉霜我心還不淺懷古醉餘觴

宿巫山下

昨夜巫山下猿聲夢裏長桃花飛綠水三月下瞿塘
雨色風吹去南行拂楚王高丘懷宋玉訪古一霓裳

謝公亭

謝公離別處風景每生愁
客散青天月山空碧水流
池花春映日窗竹夜鳴秋
今古一相接長歌懷舊遊

夜泊牛渚懷古

牛渚西江夜青天無片雲
登舟望秋月空憶謝將軍
余亦能高詠斯人不可聞
明朝挂帆席楓葉落紛紛

尋雍尊師隱居

羣峭碧摩天
逍遙不記年
撥雲尋古道
倚樹聽流泉
花暖青牛卧
松高白鶴眠
語來江色暮
獨自下寒煙

訪戴天山道士不遇

犬吠水聲中
桃花帶雨濃
樹深時見鹿
溪午不聞鐘
野

竹分青靄飛泉挂碧峯
無人知所去愁倚兩三松

對酒憶賀監

并序

太子賓客賀公於長安紫極宮一見余呼余為
謫仙人因解金龜換酒為樂悵然有懷而作是

詩

四明有狂客風流賀季真
長安一相見呼我謫仙人
昔好杯中物翻為松下塵
金龜換酒處却憶淚沾巾

聽蜀僧濬彈琴

蜀僧抱綠綺西下峨眉峯
為我一揮手如聽萬壑松
客心洗流水餘響入霜鐘
不覺碧山暮秋雲暗幾重

見野草中有曰白頭翁者

醉入田家去行歌荒野中如何青草裏亦有白頭翁折
取對明鏡宛將衰鬢同微芳似相誚留恨向東風

題宛溪館

吾憐宛溪好百尺照心明可謝新安水千尋見底清白
沙留月色綠竹助秋聲却笑巖湍上於今獨擅名

觀胡人吹笛

胡人吹玉笛一半是秦聲十月吳山曉梅花落敬亭愁
聞出塞曲淚滿逐臣纓却望長安道空懷戀主情

春日歸山寄孟六浩然

朱紱遺塵境青山謁梵筵金繩開覺路寶筏度迷川嶺
樹攢飛栢巖花覆谷泉塔形標海月樓勢出江煙香氣

三天下鐘聲萬壑連荷秋珠已滿松密蓋初圓鳥聚疑
聞法龍叅若護禪愧非流水韻叨入伯牙絃

宣州九日聞崔四侍御與宇文太守遊敬亭余時

登響山不同此賞醉後寄崔侍御

九卿天上落五馬道傍來列戟朱門曉褰帷碧嶂開登
高望遠海召客得英才紫綬歡情洽黃花逸興催山從
圖上見谿即鏡中迴遙羨重陽作應過戲馬臺

送友人尋越中山水

聞道稽山去偏宜謝客才千巖泉灑落萬壑樹縈迴東
海橫秦望西陵繞越臺湖清霜鏡曉濤白雪山來八月
枚乘筆三吳張翰杯此中多逸興早晚向天台

送儲邕之武昌

黃鶴高樓月長江萬里情春風三十度空憶武昌城送
爾難為別銜杯惜未傾湖連張樂地山逐泛舟行諾謂
楚人重詩傳謝朓清滄浪吾有曲寄入棹歌聲

贈郭將軍

將軍豪蕩有英威昔掌銀臺護紫微平明拂劍朝天去
薄暮垂鞭醉酒歸愛子臨風吹玉笛美人騰月舞羅衣
疇昔雄豪如夢裏相逢且欲醉春暉

寄崔侍御

宛溪霜夜聽猿愁去國長為不繫舟獨憐一雁飛南海
却羨雙谿解北流高人屢解陳蕃榻過客難登謝朓樓

此處別離同落葉朝朝分散敬亭秋

別中都明府兄

吾兄詩酒繼陶君試宰中都天下聞東樓喜奉連枝會
南陌愁為落葉分城隅綠水明秋日海上青山隔暮雲
取醉不辭留夜月雁行中斷惜離羣

送賀監歸四明應制

久辭榮祿遂初衣曾向長生說息機真訣自從茅氏得
恩波應阻洞庭歸瑤臺含霧星辰滿仙嶠浮空島嶼微
借問欲棲珠樹鶴何年却向帝城飛

登金陵鳳凰臺

鳳凰臺上鳳凰遊鳳去臺空江自流吳宮花草埋幽徑

晉代衣冠成古丘三山半落青天外二水中分白鷺洲
總為浮雲能蔽日長安不見使人愁

鸚鵡洲

鸚鵡來過吳江水江上洲傳鸚鵡名鸚鵡西飛隴山去
芳洲之樹何青青煙開蘭葉香風暖岸夾桃花錦浪生
遷客此時徒極目長洲孤月向誰明

題東谿公幽居

杜陵賢人清且廉東谿卜築歲將淹宅近青山同謝朓
門垂碧柳似陶潛好鳥迎春歌後院飛花送酒舞前筵
客到但知留一醉盤中祇有水晶鹽

王昭君

昭君拂玉鞍上馬啼紅頰今日漢宮人明朝胡地妾

相逢行

相逢紅塵內高揖黃金鞭萬戶垂楊裏君家阿那邊

玉階怨

玉階生白露夜久侵羅襪却下水晶簾玲瓏望秋月

靜夜思

牀前看月光疑是地上霜舉頭望山月低頭思故鄉

綠水曲

綠水明秋月南湖採白蘋荷花嬌欲語愁殺蕩舟人

秋浦歌

秋浦錦駝鳥人間天上稀山雞羞淥水不敢照毛衣

兩鬢入秋浦一朝颯已衰猿聲催白髮長短盡成絲
秋浦多白猿超騰若飛雪牽引條上兒飲弄水中月
愁作秋浦客強看秋浦花山川如剡縣風日似長沙
醉上山公馬寒歌窸戚牛空吟白石爛淚滿黑貂裘
秋浦千重嶺水車嶺最奇天傾欲墮石水拂寄生枝
江祖一片石青天掃畫屏題詩留萬古綠字錦苔生
邏人橫鳥道江祖出魚梁水急客舟疾山花拂面香
水如一匹練此地即平天耐可乘明月看花上酒船
淙水淨素月月明白鷺飛郎聽采菱女一道夜歌歸
白髮三千丈綠愁似箇長不知明鏡裏何處得秋霜
秋浦田舍翁采魚水中宿妻子張白鷗結罟映溪竹

桃波一步地了了語聲聞聞與山僧別低頭禮白雲

陪侍郎叔遊洞庭醉後

剗却君山好平鋪湖水流巴陵無限酒醉殺洞庭秋

九日龍山飲

九日龍山飲黃花笑逐臣醉看風落帽舞愛月留人

獨坐敬亭山

衆鳥高飛盡孤雲獨去閑相看兩不厭只有敬亭山

憶東山

不向東山久薔薇幾度花白雲還自散明月落誰家

重憶

欲向江東去定將誰舉杯稽山無賀老却棹酒船回

勞勞亭

天下傷心處勞勞送客亭春風知別苦不遣柳條青

自遣

對酒不覺暝落花盈我衣醉起步谿月鳥還人亦稀

怨情

美人捲珠簾深坐顰娥眉但覺淚痕濕不知心恨誰

贈內

三百六日日日醉如泥雖爲李白婦何異太常妻

越女詞

長干吳兒女睂目艷星月屐上足如霜不著鴉頭襪
吳兒多白皙好爲蕩舟劇賣眼擲春心折花調行客

耶溪採蓮女見客棹歌迴笑入荷花去佯羞不出來
東陽素足女會稽素舸郎相看月未墮白地斷肝腸
鏡湖水如月耶溪女如雪新妝蕩新波光景兩奇絕

浣沙石上女

玉面耶溪女青蛾紅粉妝一雙金齒屐兩足白如霜

清平調詞

雲想衣裳花想容春風拂檻露華濃若非羣玉山頭見
會向瑤臺月下逢

一枝濃艷露凝香雲雨巫山枉斷腸借問漢宮誰得似
可憐飛燕倚新妝

名花傾國兩相歡長得君王帶笑看解釋春風無限恨

沉香亭北倚欄干

少年行

五陵年少金市東銀鞍白馬度春風
落花踏盡遊何處笑入胡姬酒肆中

橫江詞

海潮南去過尋陽牛渚由來險馬當橫
江欲渡風波惡一水牽愁萬里長
橫江西望阻西秦漢水東連楊子津
白浪如山那可渡狂風愁殺峭帆人
海神來過惡風迴浪打天門石壁開
浙江八月何如此濤似連山噴雪來

橫江館前津吏迎向余東指海雲生
郎今欲渡緣何事如此風波不可行

月暈天風霧不開海鯨東感百川迴
驚波一起三山動公無渡河歸去來

永王東巡歌

永王正月東出師天子遙分龍虎旗
樓船一舉風波靜江漢翻為雁鷺池
三川北寇亂如麻四海南奔似永嘉
但用京山謝安石為君談笑靜胡沙

龍蟠虎踞帝王州帝子金陵訪古丘
春風試暖昭陽殿明月還過鳩鵲樓

帝寵賢王入楚關掃清江漢始應還初從雲夢開朱邸
更取金陵作小山

上皇西巡南京歌

邊塵輕拂建章臺聖主西巡蜀道來劔壁門高五千尺
石為樓閣九天開
九天開出一成都萬戶千門入畫圖草樹雲山如錦繡
秦川得及此間無
華陽春樹號新豐行人新都若舊宮柳色未饒秦地綠
花光不減上陽紅
誰道君王行路難六龍西幸萬人歡地轉錦江成渭水
天迴玉壘作長安

萬國同風共一時錦江何謝曲江池石鏡更名天上月
後宮親得照蛾眉

濯錦清江萬里流雲帆龍舸下揚州北地雖誇上林苑
南京還有散花樓

秦開蜀道置金牛漢水元通星漢流天子一行遺聖跡
錦城長作帝王州

水綠天青不起塵風光和暖勝三秦萬國煙花隨玉輦
西來添作錦江春

劔閣重關蜀北門上皇歸馬若雲屯少帝長安開紫極
雙懸日月照乾坤

峨眉山月歌

峨眉月半輪秋影入平羌
江水流夜發清溪向三峽
思君不見下渝州

贈汪倫

李白乘舟將欲行忽聞岸上踏歌聲
桃花潭水深千尺不及汪倫送我情

聞王昌齡左遷龍標遙有此寄

楊花落盡子規啼聞道龍標過五溪
我寄愁心與明月隨風直到夜郎西

送賀賓客歸越

鏡湖流水漾清波狂客歸舟逸興多
山陰道士如相見應寫黃庭換白鵝

黃鶴樓送孟浩然之廣陵

故人西辭黃鶴樓煙花三月下揚州
孤帆遠影碧空盡唯見長江天際流

山中問荅

問余何事棲碧山笑而不荅心自閒
桃花流水杳然去別有天地非人間

荅湖州迦葉司馬問白是何人

青蓮居士謫仙人酒肆藏名三十春
湖州司馬何須問金粟如來是後身

陪族叔刑部侍郎奕及中書賈舍人至遊洞庭

洞庭西望楚江分水盡南天不見雲
日落長沙秋色遠

不知何處吊湘君

南湖秋水夜無煙耐可乘流直上天且就洞庭賒月色
將船買酒白雲邊

洞庭湖西秋月輝瀟湘江北早鴻飛醉客滿船歌白紵
不知霜露入人衣

帝子瀟湘去不還空餘秋草洞庭間淡掃明湖開玉鏡
丹青畫出是君山

望廬山瀑布水

日照香爐生紫煙遙看瀑布挂前川飛流直下三千尺
疑是銀河落九天

登廬山五老峯

廬山東南五老峯青天削出金芙蓉九江秀色可攬結
吾將此地巢雲松

望天門山

天門中斷楚江開碧水東流至北迴兩岸青山相對出
孤帆一片日邊來

客中行

蘭陵美酒鬱金香玉碗盛來琥珀光但使主人能醉客
不知何處是他鄉

早發白帝城

朝辭白帝彩雲間千里江陵一日還兩岸猿聲啼不盡
輕舟已過萬重山

秋下荆門

霜落荆門江樹空
布帆無恙挂秋風
此行不為鱸魚膾
自愛名山入剡中

蘇臺覽古

舊苑荒臺楊柳新
菱歌清唱不勝春
只今唯有西江月
曾照吳王宮裏人

越中覽古

越王句踐破吳歸
義士還家盡錦衣
宮女如花滿春殿
只今唯有鷓鴣啼

山中與幽人對酌

兩人對酌山花開
一杯一杯復一杯
我醉欲眠卿且去

明朝有意抱琴來

與史郎中欽聽黃鶴樓上吹笛

一為遷客去長沙
西望長安不見家
黃鶴樓中吹玉笛
江城五月落梅花

軍行

騮馬新跨白玉鞍
戰罷沙場月色寒
城頭鐵鼓聲猶震
匣裏金刀血未乾

從軍行

百戰沙場碎鐵衣
城南已合數重圍
突營射殺呼延將
獨領殘兵千騎歸

春夜洛城聞笛

誰家玉笛暗飛聲散入春風滿洛城此夜曲中聞折柳
何人不起故園情

宣城見杜鵑花

蜀國曾聞子規鳥宣城還見杜鵑花一叫一迴腸一斷
三春三月憶三巴

長門怨

天迴北斗挂西樓金屋無人螢火流月光欲到長門殿
別作深宮一段愁
桂殿長愁不記春黃金四屋起秋塵夜懸明鏡青天上
獨照長門宮裏人

春怨

白馬金羈遼海東羅幃繡被卧春風落月低軒窺燭盡
飛花入戶笑牀空

陌上贈美人

駿馬驕行踏落花垂鞭直拂五雲車美人一笑褰珠箔
遙指紅樓是妾家

口號吳王美人半醉


風動荷花水殿香姑蘇臺上宴吳王西施醉舞嬌無力
笑倚東窗白玉牀

贈段七娘

羅襪凌波生網塵那能得計訪情親千杯綠酒何辭醉
一面紅妝惱殺人

御定全唐詩錄卷第二十三

御定全唐詩錄卷第二十三
唐詩錄卷第三
御定全唐詩錄卷第二十三
御定全唐詩錄卷第二十三



全唐詩話卷之三

